

REGIONAL NEWS BULLETIN

HEADLINES (MORNING)

- 1. Nov ni 11-a Dampa Assembly bial inthlan vote thlak tur atana vote zawn beihpui ngawrh chhoh mek a ni.
- 2. Agriculture Minister Pu P.C. Vanlalruata leh Revenue Minister Pu B. Lalchhanzova-te kaihhruaiin Agriculture Land Survey chungchang meeting neih a ni.
- 3. GST rate tihhniam anih avangin kumin kutpui laia sumdawngte inhralhna chu a san ber tum a thleng
- 4. Nimin khan Bihar Assembly inthlan thawhnhnihna atana nomitaion pek luhte endik a ni.

<><><>

DAMPA ELECTION CAMPAIGN

Nov ni 11-a Dampa Assembly bial inthlan vote thlak tur atana vote zawn beihpui chu Political Party hrang hrang ten ngawrh takin an thlak mek a,

ZPM Leader, Chief minister Pu Lalduhoma chuan nimin khan ZPM Dampa West Block Campaign chu New West Phaileng-ah hawng a; Dampa bial mipuite chu opposition MLA bial atanga ruling MLA bial ni thei tura party bik sawi loa ZPM candidate vote theuh turin a sawm.

Pu Lalduhoma chuan, Dampa bial chu India rama district hnufual leh changkang lo, aspirational district a ni a, hemi atang hian ZPM chuan chhanchhuah an duh a ti a; opposition bial atanga ruling biala awm ve tur in a sawm a ni.

Dampa bial by-election neih turah BJP Party tan campaign turin Union Minister Kiren Rijiju chuan vawiin hian zan khat riakin Mizoram a rawn tlawh dawn a, West Phaileng pan nghalin vantlang inkhawmah thusawiin bialchhunga mi hrang hrang a kawm dawn a, tlai lamah Aizawl lo letin Hotel Regency ah thuthar thehdarhtute a kawm ang.

Pu Rijiju-a hian Reiek a tlawh bawk anga, Reiek ah hian vantlang inkhawm a hmanpui dawn bakah Dampa Bial by-election atana BJP campaign hun ruat hrang hrang a hmanpui dawn a ni.

MPCC President Lal Thanzara chuan Dampa bial a bye-election campaign neiin Kanghmun-ah nimin khan hun a hmang.

MPCC President Lal Thanzara chuan Congress Party chu inthlan dawna an party intiamna tihlawhtling thin an ni tih sawiin tuna sawrkar mekte leh MNF ten an intiamna an tihlawhtling ngai lo a ti.

Kawng a chhia a lirthei khalhtute an nuar a, Bana Kaih ah te pawh mipuite an beidawng em em a. Central Scheme awmsa an mahnii siam angin an sawi mai a. Congress Party chuan NLUP an scheme siamkan sawi a, an tihlawhtling a, chhungkua nuai khat leh sing li chuang NLUP hmangin an chhawmdawl a ni a ti.

ZPM Sawrkar chuan sum leh pai an nei lo tih sawiin Pu Lal Thanzara chuan Central sawrkar an dawr a, BJP sumin an campaign a, an intiamna ang an tih leh loh avangin Central Sawrkar in an hrek mek a ni, a ti.

Ramchhungah BJP an kal na em em a, chu chu an Hindu puite pawhin an duh lo tih sawiin Pu Lal Thanzara chuan Congress boruak chu India ramah a tha tawh em em a ni, a ti.

Dampa bial bye-election a MNF official candidate MNF Senior Vice President Dr. R. Lalthangliana chuan Dampa West leh Dampa South Block khaw hrang hrangte a fan chhuah hnuin Phuldungsei PHC a tlawh a. Phuldungsei PHC-ah hian IV Grade hnathawk pawh an awm lo a, thawktute an indaih lo hle a, khawtlang mipui an buai hle bawk a ni a ti a. Marpara leh West Phaileng PHC-te pawh tlawhin thawktu indaih loh avanga an manganna leh thawktute harsatna tawh hrang hrang a takin a hmuhpui tih a sawi a ni.

Dampa bial chuMamit District huam chhunga awm a nih angin, thlan tlin a nih chuan bial chhung khaw hrang hranga PHC leh Sub-Centre te pawh Aspirational District a nihna hmang tangkaiin, hriselna lamah hmasawna a awm theih nan leh Staff indaih lohna avanga bial mipuiin harsatna an tawh thin sukiang tura theihtawp chhuah a tum thu a sawi.

Mizoram Sorkar chuan health sector lam chu mihring thih leh dam inkar a nih avangin ngaihsak bik se a duh thu a sawi bawk a, Phuldungsei, Marpara leh West Phaileng PHC te manganna leh harsatna te hi ZPM Sorkar in a rang thei ang bera an ngaihsak a phut tih a sawi a ni.

<><><>

PHE

PHE Dept chuan Aizawl khawpuiah tui sem tur duh ang tawh a awm theih loh chhan a sawifiah a,

PHE Engineer-in-Chief Pi Zodinthari chuan thuchhuah siamin tui sem khaihlak chhan hrang hrang a sawi a, Kumin fur tan tirah khan Vaivakawn Zohnuaiah (Phase-III) Pipe line chu lei chein a tih chhiat avangin he Scheme atanga tui pump chhuah thin chu vawiin thlengin tui pump theih lova. Tlawng Reiek kai atanga Greater Aizawl Water Supply Scheme, Phase-I & Phase-II atanga tui pump chhuah thin pawh ruah a sur apiangin tui tihfim theih loh khawpa a nut nasat thin avang in tui pump chhuah theih zat tur pump chhuah theih ani thin lo bawh a ni. Heti tak a tui a nut nachhan hi tlawng lui fintu luite ah mipuiin leivung an paih avang te, kawng laihna leivung an paih avang te leh ramhnuai leimin avang te a ni deuh ber a ti a. Tui nut san lai phei chuan NTU 1000 chuang te ni thin a ni.

Aizawl khawpuiin ni tin tui 38 MLD a mamawh laiin Greater Aizawl Water Supply Scheme, Phase-I & Phase-II hian ni khatah 25 MLD to 28 MLD chauh tui pump theih a ni. Hei vang hian Aizawl khawpui chhungah chawhrualin thla khat chhungin tui connection pakhtah tui vawi hnih-khat bak sem tur a awm thei lo a ti.

Phase-III Pipe line Zohnuai a mi hi siam mek a ni tih sawiin, PWD lamin kawng chhak lam leimin dawl na an siam ve mek a. Ruah a la sur fo avangin leimin hi a la tawh zel a, hmasawn a harsa viau a, chuti chung chuan ngawrh takin PWD leh PHE te hian hma an la mek a. November thla chhungin tui pump chhuah leh theih beisei a ni a ti.

Aizawl khawchhungah hian mimal tuizem atang leh pipe line atang a tui leak ven hna theih tawp in Department in a thawk tih sawiin, hma pawh an sawn hle a ti a. Tui leak report na tur Water Leak Report Apps siam chu hmang tangkaiin vawiin thlenga he Application kaltlanga tui leak report lut zat chu 310 a chuang tawh a ti a, a rang thei ang bera siam that hna thawh nghal zel a ni bawh a ni.

Tui ren chungchangah te, ruah tui khawh chungchangah te, tui leak ven chungchangah te leh mipui in tur tui lak tibawhlhlawh thintu leivung leh bawhlhlawh te hi a paihna hmuna paih turin PHE Department chuan mipuite thawhpaina a sawm a, tun hnaia tui sem that theih loh chungchangah mipui te hriathiam tih a sawi bawh a ni.

(PR)

<><><>

AGRICULTURE

Agriculture & Farmers’ Welfare Minister Pu P.C. Vanlalruata leh Land Revenue & Settlement Minister of State Pu B. Lalchhanzova-te kaihhruaiin Digital Agriculture Mission peng pakhat, Agristack atana Agriculture Land Survey chungchang sawihovin nimin khan Aijal Club Conference Hall-ah dept hotute an thukhawm a.

Pu P.C. Vanlalruata chuan Digital Agriculture Mission chu mission namai lo a ni a ti a, Sawrkar hmalakna atana data neih that a pawimawhzia sawiin, data hmang chuan loneitute chu an thil mamawhte nena tuahrem an ni thei dawn a ni, a ti.

Revenue Minister Pu B. Lalchhanzova pawhin thu sawiin, department-te chu inmamawh tawn an ni a, mumal taka thawhho nan convergence framework changtlung neih a rawt a. Thawhhona tha rah chu ram tan leh loneitute tan hmasawna leh thlamuanna a ni dawn tih a sawi a ni.

He thutkhawm hi district hrang hrang atangin DC te, Autonomous District Council hruaitute leh department hotute’n video conference hmangin an chhim a ni.

Sorkar thuchhuah tarlan danin Agriculture Dept chuan Digital Crop Survey an kalpui that avangin SASCI hnuaiah cheng vaibelchhe 50 bakah North East State tithate tana cheng vaibelchhe 10 belh chu an dawng thei dawn a. LR&S pawhin Handholding Scheme hnuaia Chief Minister’s Land Reforms Programme atangin cheng vaibelchhe 5 an hmu dawn bawh a ni.

(Desk)

<><><>

TERRITORIAL ARMY PRE TRAINING

166 Infantry Batallion Territorial Army hnuaia ami, Lunglei Pukpui a Territorial Army te chuan Nov ni 16-a Rajiv Gandhi Stadium, Aizawla Recruitment Rally a neih tur atan Coaching/Pre-Recruitment rally Lungleiah an nei mek a.

Lt Colonel Prasant Kakade chuan Mizo thalai ten he Pre recruitment rally hi chhim tura sawmin a hlawp a lak hun atan a intuaihriamna a ni a, hmang tangkai turin Mizo thalai te a sawm.

Kan corr report lo ngaithla ang.

VC

Tunah hian thalai 20 vel in Pre recruitment rally hi chhim in zingah leh tlai lamah training hi an bei thin a ni. An zingah hian Lunglei G ovt College a BA zirlai, NCC Cadet nilai te pawh an tel a, a then chu Boxing leh Judo lam a tawnhriat lo nei tawh te niin Lunglei khawpawh lam atanga tlangval piantha leh hrisel hmel tak tak te pawh an tel a ni.

Pre-recruitment bei mek te hi Lunglei khawpui chhunga veng hrang hrang, Pukpui, Bazar veng, Chanmari, Electric veng, Farm, veng leh Ramthar a mi te an ni a, hmeichhia 3 an tel bawh. Taksa sawizawi a hun hman a, sipai thununma hnuaia awm chu hahthlak chang awm mahse tunah chuan an thiam ve tan tawh tih an sawi a, tlan, in nemkan, thui zawng leh sang zawng a zuan te chu an in zirna a ni tih an sawi.

Puan tawh angin Territorial Army Recruitment Rally neih turah hian Soldier(General Duty) hi 144 lak tur a ni a, mipa 135 leh hmeichhia 9 lak an ni ang. Hei bakah hian Clerk-05, Tradesman11 lak an ni ang.

(Thanghmingliana Lunglei PTC)

<><><>

IODINE DIFICIENCY DISORDER

Iodine tlakchham avanga natna hrang hrang laka invenna ni Global Iodine Deficiency Disorders Prevention Day chu nimin khan Health Workers’ Training School, Aizawl Kulikawn-ah hman a ni a, National Health Mission Mission Director Dr. Lily Chhakchhuak chuan a hmanpui.

Dr. Lily Chhakchhuak chuan Sawrkar laipui thupek angin Mizoram-ah Iodine tlakchham hriatna langsar ber Awrpuar Survey neih a nih thin thu a sawi a, Survey hmasa ber Kum 1978 a neih ah Awrpuar zaa 69 hmuhchhuah a ni a, National Family Health Survey 2013-14 ah chuan Mizoramah Awrpuar zaa 6.65 vel an la awm a, Kum 2019-21-a NFHS-5 ah chuan National Goal zaa 5 aia hniam zaa 0.376 an awm tawh a ni a ti.

NIDDCP Technical Officer Dr. Nathan Vanlalhruaizela chuan Iodine tlakchhamna avangin Mihring taksa leh rilru-ah harsatna chi hrang hrang siamthat theih tawh loh a thlen thin thu sawiin Nauchhiat, thla kim lova nau hrin, hlamzuih, nau thisa a piang, pianphunga rualban lohna hrang hrang tawngtheilo, bengngawng, mitkalh, rilru kimlo leh chaklo, lehkha thiam theilo, sawngnawi, fuke tawi te a awm tir theih thu a sawi bawk.

He huna tarlan anih danin, kumin chhungin Serchhip District leh Kolasib District-ah awrpuar Survey neih tawh a ni a, mi 2,990 test niin hemi atang hian awrpuar zaa 2.6 vel hmuhchhuah a ni.

(DIPR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

SALES

GST rate tihhniam anih avangin kumin kutpui laia sumdawnge inhralhna chu a san ber tum a thleng a. Confederation of All India Traders ten an zirchiannaah Navrati leh Diwali inkar kutpui hman chhunga sumdawnkten cheng vaibelchhe nuai 5 sing li chuang man an hralh a. Service lamah pawh cheng vaibelchhe sing 6 leh sang 5 chuang hmuh a ni. Nikum tun ang hun nena khaikhinin sumdawnge inrhalhna hi zaa 25 laiin a pung a ni.

(Newsonair)

<><><>

BIHAR ELECTION

Nimin khan Bihar Assembly inthlan thawhnhnihna atana nomitaion pek luhte endik a ni. Inthlan thawhnhnihna hi Assembly bial 122 ah neih tur a ni a. Thla thar November ni 11 ah district 20 ah vote thlak a ni ang.

Hetihlai hian Inthlan thawhkhatna seat 121 a neih turah candidate 1314 an awm dawn a. Thaleh November ni 6 ah vote thlak a ni ang.

Assemby inthlan tur atan hian Political Paty hrang hrangte ngawrh takin an campaign chho mek a ni.

(Newsonair)

<><><>